

Նոյնանման գաղափար է արծարծում նաև հետևեալ երգը, որ տարածուած է Տաճկահայաստանի մի քանի գաւառներում.

Հրմա, մամս, հրմա մամս, արի ի՞նչ է էզի.
 Եկած են զիս կըտանեն, ի՞նչ են բերած.
 Բերած են տըմբ ու տըմբ, զրո ու զրո
 Պլանկճոռին, մազէ խարխիս, ծամ թոթվիչ.
 Ուռ պսակիչ. ապոյին բերած են քօլօս մը,
 Մախաթ ձէր կըսոսկըտայ կանեն վրէն,
 Հար քոսուրայ բերան մէկ կ'երևայ:
 Հրմա եկան տարան, տարան քաւորոջ
 Տուն զըրեցին, փշաներ կերանք.
 Տէրտէր էկաւ ըրեց պրտուպուտ
 Գնաց, խը ես կածէ չենք¹⁾:

Ի հարկէ, և ծնողները սովորութեան ազդեցութեան տակ նայում են իրենց աղջկայ վրայ, իբրև մի առարկայի: Շատ ուշադրաւ են այն խօսքերը, որ արտասանում է մայրը Գանձակի գաւառում պսակադրութեան գիշերն, իւր աղջկանից բաժանուելիս. «Ինչ էս լաց ըլում, որ աղջիկն ա իր հօր տանը մնացել, որ դու մնաս: Մի բուռ մոխիր ես՝ ուրիշին ենք տալիս, պէտք ա գնաս, ջուրն ենք զըցում՝ պէտք ա սուս կենաս, ընկնես, կրակն ենք զցում, պէտք ա աչքերդ խփես, մէջն ընկնես...²⁾:

VII.

Արդ կարող է հարց ծագել, թէ ո՞ր է գնում և ո՞ւր է պատկանում այն վճարը, որ ստացւում է հարսի գնման գործողութիւնից: Մանաւանդ հասկանալի է այս տեսակ հարցի առաջանալը, երբ մտաբերենք, որ մի քանի տեսակ ընծայաբերութիւններն ու փողերը գառնում են հարսի անձնական սեփականութիւն, որպիսին է արնագինը, որի մասին արդէն առիթ ենք ունեցել խօսելու:

¹⁾ «Բազմապէս» 1902 թ. № 9—10. էր. 481.

²⁾ Ե. Լալայեան—Գանձակի գաւառ, էր. 27.